

Shodno odredbama člana 5. i 7. Zakona o Poreznoj upravi Federacije Bosne i Hercegovine („Službene novine Federacije BiH“, br: 33/02, 28/04, 57/09, 40/10, 27/12, 7/13, 71/14, 91/15), kao i odredbama člana 22. Zakona o krivičnom postupku Federacije BiH („Službebe novine Federacije BiH“, br 35/03, 37/03, 56/03, 78/04, 28/05, 55/06, 27/07, 53/07, 09/09, 12/10, 08/13, 59/14), Porezna uprava Federacije Bosne i Hercegovine, sa jedne strane, i Uprava policije Ministarstva unutrašnjih poslova Kantona Sarajevo, sa druge strane, uz uvažavanje principa međusobne saradnje, zaključuju:

PROTOKOL **o međusobnoj saradnji**

I

Strane potpisnice ovog protokola, uvažavajući principe uzajamnosti i međusobne saradnje u obavljanju poslova i zadataka i u skladu sa propisima svako iz svoje nadležnosti, obavezuju se da će svaka od potpisnica ovog Protokola drugoj strani blagovremeno ustupati neophodne podatke i informacije u vezi sa aktivnostima iz nadležnosti druge strane potpisnice protokola. Tajne i lične podatke strane će ustupati u skladu sa propisima koji regulišu oblast zaštite tajnih i oblast zaštite ličnih podataka u Bosni i Hercegovini.

II

Policijski službenici Uprave policije Ministarstva unutrašnjih poslova Kantona Sarajevo (Odjeljenje za privredni kriminal) će prilikom saznanja o podacima i informacijama koje ukazuju na eventualno nepoštivanje poreznih zakona od strane poreznih obveznika ili drugih lica na području Kantona Sarajevo, osim krivičnih djela iz nadležnosti Uprave policije Ministarstva unutrašnjih poslova Kantona Sarajevo, za koja sami podnose izvještaje o počinjenju nadležnom tužilaštvu, odmah putem e-maila ili telefona (koji će se naknadno dostaviti potpisnicima predmetnog protokola), obavijestiti odgovornu osobu – šefa Odsjeka za inspeksijski nadzor Kantonalnog poreznog ureda Sarajevo ili rukovodioca Kantonalnog poreznog ureda Sarajevo o pravnom ili fizičkom licu za koje se sumnja da je počinilo povrede odredbi poreznih zakona, te mjestu i vremenu učinjenja povrede.

O navedenom će Uprava policije Ministarstva unutrašnjih/unutarnjih poslova i pismenim podneskom naknadno obavijestiti Kantonalni porezni ured Sarajevo, a predmetni pismeni podnesak Kantonalni porezni ured Sarajevo će dostaviti Središnjem uredu Porezne uprave Federacije BiH.

III

U pismenom podnesku, kojim Uprava policije Ministarstva unutrašnjih poslova Kantona Sarajevo, uz saglasnost tužioca KT Sarajevo, obavještava Kantonalni porezni ured Sarajevo o sumnji da je pravno ili fizičko lice počinilo povrede odredbi poreznih zakona, neophodno je opisati uočeno činjenično stanje, odnosno saznanja, ako ista sadrže obilježja prekršaja ili krivičnog djela iz oblasti poreza, te navesti lica i dokaze iz kojih proizilaze osnovi sumnje da su počinila prekršaj ili krivično djelo iz oblasti poreza sa sljedećim podacima:

-fizičko lice (ime i prezime lica, adresa stanovanja, zanimanje, opis uočenog činjeničnog stanja, mjesto i vrijeme, zatečeni predmeti, eventualni svjedoci i drugi podaci kojima budu raspolagali),

-pravno lice (naziv i adresa firme, ime i prezime odgovornog lica, opis djelatnosti kojom se bavi, opis uočenog činjeničnog stanja, mjesto i vrijeme, zatečeni predmeti, eventualni svjedoci i drugi podaci kojima budu raspolagali).

IV

Po prijemu informacije o postojanju osnova sumnje o počinjenoj/počinjenim povredama poreznih zakona, šef Odsjeka za inspeksijski nadzor će u dogovoru sa rukovodiocem Kantonalnog

poreznog ureda Sarajevo procijeniti neophodnost obavljanja urgentnog inspekcijskog nadzora, preduzimanja neke druge radnje iz nadležnosti Kantonalnog poreznog ureda Sarajevo ili informaciju prosljediti drugim organizacionim jedinicama Porezne uprave Federacije BiH ili drugim nadležnim organima na dalje postupanje, o čemu će sačiniti zapisnik o obavljenom inspekcijskom nadzoru, službenu zabilješku ili informaciju. Jedan primjerak zapisnika, zabilješke ili informacije se dostavlja i Upravi policije Ministarstva unutrašnjih poslova Kantona Sarajevo, za slučajeve za koje je Uprava policije dostavila informaciju o postojanju osnova sumnje o počinjenim povredama poreznih zakona.

V

Ukoliko ovlašteni radnici Porezne uprave Federacije Bosne i Hercegovine – Kantonalnog poreznog ureda Sarajevo (federalni porezni inspektori), kao i drugi državni službenici ovog organa, prilikom obavljanja poslova iz svoje nadležnosti dođu do saznanja o podacima ili informacijama u vezi sa počinjenim krivičnim djelom (osim krivičnih djela iz oblasti poreza za koja sami podnose izvještaje o počinjenju nadležnom tužilaštvu) iz nadležnosti Uprave policije Ministarstva unutrašnjih poslova Kantona Sarajevo, odmah će o tome obavijestiti Upravu policije na broj telefona 122, a nakon toga uputiti i pismeni podnesak sa svim raspoloživim podacima, i to:

-mjesto, vrijeme, način i sredstva izvršenja krivičnog djela, i o potencijalnim izvršiocima ili licima koja su se zatekla na mjestu izvršenja krivičnog djela.

VI

Shodno članu 5. Zakona o Poreznoj upravi Federacije BiH, na pismeni zahtjev Porezne uprave Federacije Bosne i Hercegovine – Kantonalnog poreznog ureda Sarajevo, Uprava policije Ministarstva unutrašnjih poslova Kantona Sarajevo, će u skladu da instrukcijom kojom se reguliše pružanje pomoći drugim organima u Upravi policije Ministarstva unutrašnjih poslova Kantona Sarajevo, osigurati neophodnu pomoć za izvršenje poreznih aktivnosti.

VII

Potpisnici ovog protokola će prema potrebi organizovati sastanak na kojem će se izvršiti analiza postignutih rezultata međusobne saradnje i dati prijedlozi za poboljšanje buduće saradnje.


VIII

Ovaj protokol stupa na snagu danom potpisivanja.

IX

Protokol je sačinjen u četiri istovjetna primjerka pri čemu svaka od ugovornih strana zadržava po dva primjerka.

Porezna uprava Federacije BiH



Mr. sci. Serif Isović
V.d. direktor

Broj: 13/01-02-1-643/19-4

Sarajevo, 11.06. 2019. godine



Kanton Sarajevo
Ministarstvo unutrašnjih poslova
Uprava policije
Za policijskog komesara
Načelnik sektora Kriminalističke policije
Glavni inspektor
Milorad Bašić

Broj: 02-79/19

Sarajevo, 11.06. 2019. godine